


Finanzas publicas solidas malgrà la crisa

Ils proxims onns vegnan ils debits publics dentant a crescer considerablmain

DA MARTIN CABALZAR/FMR

■ **Ils onns 2018/2019 è la situaziun finanziaria dals tegnairchasas publicas stada ordvart positiva. Tut ils stgalims e secturs da noss stadi han saldà lur quints cun gudogns, era vischnancas ch'avevan stuì registrar ils onns precedents deficits. En consequenza da la pandemia Covid-19 che ha chaschunà la pli gronda crisa economica dapi decennis, ston ils tegnairchasas publicas dentant quintar a partir da quest onn cun cifras ferm cotschnas.** Quai ha l'Administraziun federala da finanzas communitgà dacurt. En consequenza da questa crisa economica vegnan era ils daijets bruts dals quints publicas a crescer marcantamain. En cumparegliaziun internaziunala dastgan las finanzas publicas da la Svizra dentant vegnir consideradas sco solidas uschea che la Svizra po surventscher la crisa meglier che la gronda part dals pajais industrialisads.



2018 e 2019 èn stads fitg buns onns

Cun ina quota d'avanzament da 1.3 pertschient dal product intern brut (PIB) han las finanzas publicas cuntanschi 2018 il meglier resultat dapi 2008. Tut ils secturs han generà avanzaments, cun in saldo da 0.7 pertschient ha la Confederaziun cuntanschi il pli aut resultat. Suenter nov onns cun resultats negativs han era las vischnancas puspè scrit cifras nairas. Era per 2019 duessen ils avanzaments dals quints publicas restar auts tenor prognosas e quai en la dimensiun da 1.4%. Quai grazia ad in augment consi-

derabel da la quota d'avanzaments da 0.8 pertschient tar la Confederaziun e da 0.5 pertschient tar ils chantuns. Las vischnancas en lur totaliad vegnan a registrar per 2019 quints equilibrads, las segiradas socialas fan probabel radund 0.1 pertschient gudogn.

Surmuntar la crisa

Per l'onn 2020 vegnan las finanzas publicas en Svizra a stuair surventscher la pli ferma crisa economica dapi decennis, quai en consequenza da la pandemia da

Covid-19. Ins quinta en il sectur statal cun in deficit da 3.7 pertschient dal BIB. Tar il BIB nominal quintan ins cun ina reduzziun da record da las entradas da taglia sin tut ils stgalims. Per pudair dar dumogn a la situaziun extraordinaria da la pandemia èn vegnidas pridas - cunzunt sin plaun federal - mesiras extraordinarias per mantegnair l'equiliber finanziel. Ils custs totals da questas mesiras pridas da la Confederaziun vegnan calculads cun radund 17.8 milliardas. La quota da deficits sin palancau federal vegn valetada

cun 3.1% dal product social brut. La dischoccupaziun creschenta vegn a procurar per expensas supplementaras da radund 16 milliardas tar las segiradas socialas. Uschia surpiglia la chassa da dischoccupaziun la rolla d'in stabilisatur automatic da l'economia. Era sche quest deficit vegn finanzià per gronda part tras las reservas da liquiditad, èsi da quintar cun in augment marcant dals debits en il sectur statal. En cumparegliaziun cun la quota da chapital ester vegnan ils debits a crescer per 5.1% sin 45.7%.

Schletas prognosas er per 2021

L'administraziun federala da finanzas quinta er per 2021 cun ina quota da deficit da minus 1.2 pertschient tar il BIB. Tar il BIB normal quintan ins cun il creschament substanzial grazia als effects laterals da recuperaziun. Risguardond il svilup resp. la revitalisaziun economica duessen era las entradas da taglia crescer puspè. Plinavant duessen la gronda part da las mesiras spezialas crudar en il decurs da l'onn, uschia che las expensas statalas duessen sa reducir marcantamain per radund 11 milliardas, speculescha l'administraziun da finanzas. Per las segiradas socialas quintan ins vinavant cun ina dischoccupaziun creschenta, uschia ch'ins quinta cun expensas supplementaras da rodund 8 milliardas sur il nivel da l'onn precedent. La quota da chapital ester vegn probabel a sa reducir per 11.6 milliardas, uschea che sia quota vegn a sa sminuir levat sin 44.0 milliardas.

Ils ristgs

Ils pli gronds ristgs per in saldo negativ a curta vista tar las finanzas publicas fiss ina segunda unda da la pandemia da Covid-19 en Svizra e tar ils partenaris da commerzi da la Svizra. Quest ristg exista era tar las entradas fiscalas da la taglia da scuntraziun. La crisa da Covid-19 pudess stgirentar e franar il creschament dals ultims onns. Da l'autra vart laschan differents indicaturs sminar che l'economia possia sa recuvarar pli svelto che spetgà. Quest scenari vegniss naturalmain er ad influenzar il svilup da las finanzas publicas a moda positiva.